



Uunga:
Inatsisartunut ilaasortaq, Jens B. Frederiksen
Demokraatit

**Inatsisartunut ilaasortaq Jens B. Frederiksen, Demokraatit § 36. imm 1
naapertorlugu apequteqaammut allakkatigut akissut.**

4. december 2008
J.nr. FFL 2008

Postboks 1037
3900 Nuuk
Oq/tel +299 34 50 00
Fax +299 32 46 14
oed@gh.gl
www.nanoq.gl

1. Akileraartarnermut Aqutsisoqarfiup immikkoortortaqaarfia sorleq Danmarkimi pilersinneqarpa?

Akissut: Akileraartarnermut Aqutsisoqarfik Danmarkimi kukknersuisartut allaffiannik pilersitsilerpoq. Kukknersuisartut allaffiata ingerlatseqatigiiffinnut annertussusiliisarneq akisussaaffigissavaa suliassallu tamakku Kalaallit Nunaanniit aqunneqaannassapput. Taamaattorli paasinarsisimavoq immikkoortortaqaarfimmut tassunga akileraarutini kukknersuisartunik pissarsinissaq ajornartoq, taamaalilluni suliassat ilaat Aalborgimi allaffimmit isumagineqartariaqassallutik, tassani akileraarutini kukknersuisartut qaammatit arfinilikkaarlugit Danmarkimi Skat-imiit attartorneqartarlutik.

2. Sulisut qassit Danmarkimi immikkoortortaqaarfimmi sulisorineqarpat?

Akissut: Aalborgimi inuttassarsiuinermut atatillugu Akileraartarnermut Aqutsisoqarfik akileraarutini kukknersuisartunit piginnaanilinnit qinnuteqaatinik 15-inik tigusaqarpoq. Taakku ilaat ataaseq 1. augustimiit Nuummi aalajangersimasumik atorfeqalerumalluni kissaateqarpoq, tamannalu taamaalilluni iluatsippoq. Akileraartarnermut Aqutsisoqarfik 1. januar 2009-miit sisamanik sulisoqarluni aallartissaaq, taakkunannga pingasut Aalborgimi ataatsimoorluni allaffimmiissallutik. Kalaallit Nunaanni Namminersornerullutik Oqartussat Aalborgimi SKAT-imi allaffinnik atuinerminnut akiliuteqartassanngillat, kisiannili nammineerlutik IT-nik attaveqaatit atortussallu pilersissallugit.

3. Sulisut Nuummi sulissanngippata Nuup Kommuniar imaluunniit Kommuneqarfik Sermersuunngortussaq akileraarutitigut pissarsiassanik qanoq annertutigisunik annaasaqassava?

Akissut: Akileraartarnermut Aqutsisoqarfik allani immikkoortortarpassualersorlugu aaqqissuussaavoq taamaammat akileraarutitigut pissarsiassaagaluanik annaasaqarsinnaanermik apeqquut Nuup Kommuniinnaanut attuumassuteqanngilaq kommunersuunngortussanulli tamanut attuumassuteqarluni. Taamaattoq pissarsiassanik annaasaqartoqassanngilaq, tassami atorfiit Kalaallit Nunaanni inuttalerneqarnissaat iluatsinngitsoomat. Paarlattuanik naatsorsuutigineqarpoq

Aalborgimi sulisut ingerlatseqatigiiffinnut akileraarusiinermi akileraarutinit pissarsiassat annertunerulernerannut iluaqutaajumaartut. Taamaaliornikkut Kalaallit Nunaanni kommunit tamarmik Nunallu Karsia aaqqissuussinerup malitsigisaanik isertitaqarnerulissapput.

4. Naalakkersuisut pilersaaruteqarpat immikkoortortaqaqarfinnik aqutsisoqarfinnilluunniit allanik Danmarkimut nuussinissaminnik Kalaallit Nunaanni sulisussarsiorsinnaanerup ajorneranik pissuteqartumik?

Akissut: Naalakkersuisut immikkoortortaqaqarfinnik aqutsisoqarfinnilluunniit allanik Danmarkimut nuussinissaminnut maannakkut pilersaaruteqanngillat. Pissutsilli imaalikkajussinnaasarput suliassat ilaat Danmarkimiit pitsaanerusumik akikinnerusumillu suliarineqarsinnaasarlutik, assersuutigalugu sulisut soraareersimasut ilisimasanik immikkullu ilisimasanik pigisaqalersimagaangata Kalaallit Nunaanni imaaliinnarlugit pilerseqqinneqarsinnaanngitsunik.

5. Naalakkersuisut suliniutit suut aallartilersaarpaat pisortat suliffeqarfiutaasa allat nunanut allanut nuunneqartariaqalersarnerat pinngitsoortinniarlugu?

Akissut: Inuiaqatigiinni ikittunnguusuni pinngitsoorneqavissinnaasassanngilaq immikkut ilisimasallit tikisinneqartarnissaat imaluunniit immikkut ilisimasallit suliassaasa nunanit allaneersunut suliakkiissutigisarnissaat. Taamaaliortarnerup killilerneqarnissaanut pitsaanerpaassaaq innuttaasut ilinniagaqarsimanermikkut qaffasissusiat qaffassaraanni taamaalilluni innuttaaqatittattaaq immikkut ilisimasalinnit suliarineqartussat suliarisinnaanngorniassammattigit. Naalakkersuisut ilinniartitaanermut pilersaarut aallartereerpaat inuusuttut ukioqatigiiaat pingajorarterutaasa marluk 2020-mi piginnaaneqalersitsisumik ilinniagaqartarnerannik ullumikkornillu amerlanerusut ingerlaqqiffiusunik ilinniagaqartarnerannik kinguneqarniartussa. Naalakkersuisut isumaat malillugu siunissami immikkut ilisimasalinnik amerlanerusunik pissarsinissamut tamanna aqquataasinnaavoq.

6. Naalakkersuisut qanoq eqqarsaatigaat suliffeqarfinnut amerlasuunut tigooraanernut atatillugu atorfissaqartinneqalersussanut sulisussanik piginnaanilinnik sulumallersitsisinaanissaq.

Akissut: Siullertut Naalakkersuisut naatsorsuutigaat Danmarkimiit suliassanik tigooraanissat pissasut ukiut amerlasuut ingerlaneranni, tassa Inatsisartut suliarmiit suliarmut isummertassammata suliassaqaarfiit qanoq aningaasalersorneqassanersut, sullissineq qanoq qaffasitsigissanersuq aamma qanoq sulisoqarnermut tunngasut aqqiivigineqartassanersut.

Tamakku saniatigut suliassat tiguneqartussat assigiinngiiaartorujussuupput. Suliassaqaarfiit ilaanni assersuutigalugu aatsitassanut tunngasuni immikkut ilisimasanik pigisaqalereernikuuvugut suliassat danskit naalagaaffianniit tigunissaannut pisariaqartinneqartunik. Suliassaqaarfinni allani assersuutigalugu

aningaasalersuinermit tunngatillugu aqutsinermi nakkutilliinermilu immikkoortortaqaqarfinnik pilersitsiortortoqartariaqassaaq annertuumik ilisimasaqarnissamik pisariaqartitsiviusunik nunanilu allani pineqartunik annertuumik suleqateqartariaqartunik.

7, 8 aamma 9. Qanoq Naalakkersuisut qulakkiilersaarpaat suliassaqaqarfinnut nutaanut 32-usunut piginnaanilinnik sulisoqalersinnaanera? Suliassaqaqarfiit nutaat 32-t ilaat qassit Danmarkimi pilersinneqassappat tunngavilersuutigalugu Kalaallit Nunaanni sulisussarsisoqarsinnaannginnera? Apeqqutip kingulliup akileraarutinit pissarsiassat qanoq annertutigisut annaaneqarnerat kingunerissavaa?

Akissutit: Namminersormik aqqissuussineq ulloq 21. juni 2009-mi atuutilissasoq naatsorsuutigineqarpoq. Taamaalereerpat Inatsisartut aalajangiisassapput danskit naalagaaffiannit suliassat qanoq tulleriinnilersorlugit qanorlu sukkatigisumik nussorneqassanersut sullissinerlu qanoq qaffasissuseqartillugu suliassat suliarineqartassanersut. Naalakkersuisut maannakkuugallartoq suliassanik tigooraanissamut pilersaarummik aalajangersaanikuunngillat Inatsisartullu Namminersorneq pillugu inatsisnngortussaq naapertorlugu suliassanik tigooraanissamut isummernikuunngillat. Taamaammat Naalakkersuisut soorunalimi suli isummerfiginngilaat suliassanut taamaattunut sulisussanik pissarsiortarnissat sulisorinniinnarniartarnissarlu pillugit apeqqut qanoq aaqqiivigineqassanersooq aamma suliassanik tigooraanerit pisortat aningaasaqarnerat qanoq sunniuteqarfigissaneraat.

Kisianni Naalakkersuisut isumaqarput suliassat tiguneqartassasut tiginissaannut akissaqalertarnerput naapertorlugu sukumiisumillu nalilersuisareernertigut suliassaqaqarfinni ataasiakkaani tamani nukissanik apeqqutit qanoq aaqqiivigineqartassanersut.

Inussiarnersumik inuulluaqqusillunga

Per Berthelsen